

■ RUMANTSCHS EN LA BASSA

Inscunter interrumentsch a Turitg

Cun Marc Spescha ed ils musicists
Curdin Nicolay ed André Gemassmer

Sin gievgia, ils 3 da mars naven dallas 19.00 envida la Uniun da las Rumantschas e dals Rumantschs en la Bassa (URB) agl emprem inscunter interrumentsch dad uonn. Quel ha liug excepziunalmain el Hotel Wallhalla, Limmatstrasse 5, 8005 Turitg (buc en la Giesserei!) Hosps dalla sera ein Marc Spescha, giurist, ed ils musicists Curdin Nicolay ed André Gemassmer.

Marc Spescha ei carschius si a Domat ensem cun treis frars. Alla Scola cantunala a Cuera ha el fatg 1977 la matura. Lu eis el staus duas gadas en l'America dil sid nua che el ha giu contacts cun communitads da basa che eran en la tradiziun da Puebla. Cheu eis el vegnius cunscients dils problems ch'ils carstgauns han en quellas tiaras. Quei ha lu dau il stausch per la direcziun da ses studis e siu engaschament professiunal. El ha studegiu giurisprudenza a Turitg e fatg 1983 il licenciatur e 1988 il doctorat. Spescha ei maridau cun ina dunna oriunda dall'Italia. Els han dus affons. Dapi 25 onns lavura el sco advocat a Turitg. Siu camp preferiu ei dapi 15 onns il dretg da migraziun. Per il mument ei siu quita primordial la aschinumada «Durchsetzungsinitiative» che seigi in'attacca brachiala encunter il stadi e che degradeschi parlament e dertgira ad in automat d'execuziun d'in scamond dil pievel.

Curdin Nicolay ei carschius si a Bever en l'Engiadina Aulta ensem cun sias treis soras. Suenten in giarsunadi da pictur ed in perfecziunament sco «Farbgestalter» ha el frequentau la Scol'aula da pedagogia a Cuera. Momentan lavura el sco scolast. Duront quei temps ha el sunau en differentas gruppas da musica ed

ha era registrau pliras canzuns. 2007 ei siu emprem toc «Kindl» cumpariu en la cumpigliaziun romontscha «Accents». Dapi lu ha Nicolay adina puspei dau concerts, surtut en l'Engiadina. 2010 ein aunc autras canzuns ch'el haveva registrau cun la musicista *Valeria Zangger* e cul musicist *Rees Coray* cumparidas. Ils davos onns quater ha el giu plirs concerts ensem cun André Gemassmer. Denter auter han els saviu sunar al «Voices on top» a Puntraschigna. Pil mument ei Nicolay vi da registrar novas canzuns per in niv disc compact che duess cumparer questa primavera.

André Gemassmer, scolast primar e catschadur cun tgierp ed olma, fa musica dapi biars onns. Naschius il di da sogn Nicolaus, carschius si en l'Engiadina, eis el finalmein puspei turnau en las muntognas suenter in temps intensiv tier la Fifa a Turitg. La carriera musicala dad Gemassmer ha entschiet cun clavazingia en la vegliadetgna da siat onns. Cun 12 onns ha el empriu da sunar ghitara e dapi siu 16avel anniversari scriva el atgnas canzuns. El ha fatg part dalla gruppa «Blanket» e suna momentan cun la gruppa «Uhu Ara Vögel». Cun siu collega Nicolay suna el dapi quatter onns ensem.

Ei vegn offeriu in aperitiv. Tier in bien sitg dat ei era temps e peda per in bien discuors. Ins sa era empustar ina fina tscheina. Fagei paleis questa occurrenza ad enconuschentas ed enconuschents. Sin seveser! Il Wallhalla contonsch'ins a pei en duas minutas naven dalla staziun principala en direcziun Sihlquai. Ulteriuras informaziuns sut: www.uniun-urb.ch e www.facebook.com/URB

Per URB: Cyril Berther



Marc Spescha, giurist specialisau sin dretg d'emigraziun.